

Lancar bersama ‘Cilik Cerdik’

Berita Harian terbit majalah dwibahasa dan anjur acara sampingan untuk galak si cilik fasih berbahasa Melayu dan Inggeris

PUSAT prasekolah Learning Adventure di Tampines dipenuhi gelak tawa kanak-kanak dan ibu bapa mereka yang menyertai majlis pelancaran majalah kanak-kanak Cilik Cerdik Sabtu lalu.

Selain menjadi kumpulan pertama yang berpeluang mendapatkan majalah Cilik Cerdik terbitan Berita Harian itu, ia juga peluang bagi ibu bapa meluangkan waktu berinteraksi dengan anak-anak mereka.

Acara pagi itu dimulakan dengan peraduan mewarna dan sesi berkenalan suai.

Ini diikuti dengan ketibaan tetamu terhormat, Anggota Parlimen GRC Ang Mo Kio Dr Intan Azura Mokhtar, yang seterusnya merasmikan majalah *Cilik Cerdik*.

Beliau juga menyampaikan hadiah kepada para pemenang peraduan mewarna.

Pengacara majlis Encik Farid Hamzah seterusnya mengadakan sesi kuiz *Cilik Cerdik* yang mengajak peserta cilik menjawab pelbagai soalan dan merebut peluang memenangi pelbagai hadiah.

Acara kemudian diteruskan dengan sesi bercerita yang dikendalikan Cik Jumaini Ariff, seorang penulis tempatan yang telah menghasilkan siri buku kanak-kanak bertajuk Ariff Ingin Tahu.

Penerbitan majalah *Cilik Cerdik* atau *Smart Kids* dalam bahasa Inggeris adalah usaha *Berita Harian* demi menggalak kedwibahasaan di kalan-



CUIT HATI MURID-MURID: Pengacara majlis Encik Farid Hamzah menjalankan pelbagai kegiatan untuk menggalak peserta menggunakan bahasa Melayu dan Inggeris – Foto-foto TAUFIK A KADER

gan penduduk setempat, khususnya murid prasekolah, selain memupuk tabiat membaca.

Ia dihasilkan dengan tajaan daripada Dana Kedwibahasaan Lee Kuan Yew (LKYFB).

Majalah itu padat dengan berita tempatan, cerita kanak-kanak serta kegiatan dan maklumat khusus bagi murid berusia antara lima dengan enam tahun.

Majalah dwibahasa yang mempunyai 16 muka surat itu diterbitkan dalam bahasa Melayu dan Inggeris.

Selain itu, Berita Harian akan turut mengadakan pelbagai acara pendekatan seperti bengkel bercerita, peraduan kuiz dan juga sesi interaksi antara ibu bapa dengan anak-anak.

Dr Intan berkata majalah Cilik Cerdik adalah satu permulaan baik bagi anak di peringkat prasekolah, terutamanya bagi mereka di peringkat tadika satu dan dua.

“Saya rasa positif dan optimis bahawa di kalangan masyarakat kita, tahap bahasa Melayu kita itu semakin meningkat. Kesedaran itu sudah ada, dan ramai ibu bapa yang juga ingin memupuk kebolehan bahasa Melayu di kalangan anak mereka,” kata beliau ketika ditemui di majlis pelancaran *Cilik Cerdik*.

Ia juga wadah bagi kanak-kanak dan ibu bapa memberi sumbangan karya.

Dalam edisi pertama majalah itu, satu peraduan foto selfie sedang dianjurkan. Peserta digalak mengirinkan foto anak mereka yang sedang membaca.

Kirinkan foto dalam bentuk JPEG menerusi e-mel kepada bhpromo@sph.com.sg, berikan kapsyen foto dalam bahasa Melayu dan jangan lupa sertakan nama, usia dan nombor telefon anda.

Lima penyertaan terbaik terpilih akan disiarkan dan pemenang akan membawa pulang baucar buku Popular bernilai \$50 setiap satu.

Penyertaan yang terbaik dalam kalangan lima yang dipilih akan memenangi baucar masuk ke taman permainan Legoland Malaysia.



DEKATI MURID-MURID: Wartawan BH Cik Nur Fadhillah Salleh (paling kiri) dan Cik Ervina Jamil (paling kanan) bersama murid-murid prasekolah di majlis pelancaran majalah Cilik Cerdik.



TERBITAN BARU: Dr Intan Azura Mokhtar menerima penerangan tentang majalah Cilik Cerdik daripada (dari kanan) Encik Mohd Zulkifli Rahmat (Editor Malam BH), Encik Adli Yashir Kuchit (Penolong kepada Editor BH), Encik Abdul Rahman Basrun (Ketua Penyunting BH) sambil diperhatikan oleh Encik Mohd Khairunan Ali (Ketua Kawasan Jabatan Pengurusan Prasekolah, Yayasan Masyarakat PAP).



PENYERTAAN KANAK-KANAK: Penulis tempatan Cik Jumaini Ariff menarik penyertaan kanak-kanak dalam sesi bercerita.



PELBAGAI KEGIATAN MENARIK: Dr Intan Azura Mokhtar yang hadir sebagai tetamu terhormat di majlis pelancaran majalah Cilik Cerdik menyampaikan hadiah kepada seorang peserta cilik di majlis tersebut.



DAPATKAN MAJALAH
Cilik Cerdik

Mereka yang ingin mendapatkan senaskah majalah itu boleh mengirinkan e-mel dan sertakan nama dan nombor telefon kepada bhpromo@sph.com.sg untuk membuat tempahan.

Alamat: Meja penyambut tamu Singapore Press Holdings, 1000 Toa Payoh North (berhampiran stesen MRT Bradell)

Masa: 10 pagi hingga 5 petang

* Bekalan terhad, yang dahulu didahulukan.

BeritaHarian.sg



beritaharian.sg/galeri-video